



دلالة البراوير في أحلام البنات

أ.د/ عادل كمال خضر

أستاذ علم النفس الإكلينيكي والتحليل النفسي
عميد كلية الآداب - جامعة بنها

- السلام عليكم ورحمه الله وبركاته .. كيف أحوالك
أستاذنا الفاضل لعلمك بخير وسعادة .. أنا حلمت قريب
بهذا الحلم ممكن تفسيره بعد إذنك وأسفة لو بزعبك ..

- حلمت إنني ذهبت لمحل براوير .. وشفت واحدة مجهولة
اشتريت براوير فقلت أشوف هي اشتريت إيه عشان
ممكن اشترى زيها .. وحت اشتريت برواز به سورة
الإخلاص .. لكنه صغير كانوا بروازين وكل برواز في
ورقة غلاف به .. شافتني وضربتني على ظهري .. وأنا
أحرجت منها قوي ، ثم عملت نفسي بشوف باقي
البراوير في المحل لكنني شفتهم ولا كآني شفت حاجة ..
ما التفسير؟؟ ... اللهم اجعله خير وأسفة على
إزعاجكم .. وربنا يخليكم ويكرمكم خالص التقدير
والتحية .

- المحلل :- أهلا بك

- الحالة :- أهلا بحضرتك معذرة على الإزعاج .

- المحلل :- عرفيني بنفسك ، سنك تعليمك عملك حالتك
الاجتماعية .. الخ

- الحالة :- أنا اسمي كريمة باحثة ماجستير .. سني
٢٩ سنة .. لست متزوجة أو مخطوبة ولم أوفق في
عمل حتى الآن . لكن فيه أمل إنى أتوظف عن قريب .

- المحلل :- وبالنسبة للزواج اتخطبتي قبل كده .
- الحالة :- لا لم أتخطب ولا مرة .. اتقدم لي كثير بس
مفيش نصيب .

- المحلل :- إيه سبب رفضك لهم .
- الحالة :- مش عارفه والله بتكون مقابلة واحدة
وبعدين لا يرجعوا وكده يعني .. نصيب .. مش عارفه
مفيش سبب محدد واضح لي .. وأحيانا هم اللي
بيرفضوا ومش بيرجعوا .

- المحلل :- إيه أكثر شيء بتفكري فيه باستمرار الأيام
اللي فاتت .
- الحالة :- تقريبا الموضوع ده ، موضوع الخطوبة
والزواج .

- المحلل :- فكري معايا بصوت عالي .. إيه اللي بتقوليه
جواكي ؟
- الحالة :- بقول حظي وحش وكل حاجة بتمنهاها لا
تحدث وربنا غضبان عليّ مع إنى لم أفعل في حد أي
حاجة والله .. وكثير بيعيط .

- المحلل :- في الأيام الماضية حضرتي فرح أو حد حكي
لك عن زواج عروسين .

- الحالة :- لا لا لا والله الصيف ده سبحان الله مفيش
حد أقارب لنا كان عنده أفراح ولم أحضر أي فرح ..
لكن واحدة صحبتي عزمتني على فرح في القاهرة يوم

٩ سبتمبر وأنا من الشرقية ومش عارفه هروح ولا لا ..
غير كده مفيش .

- المحلل :- يعني أنتي ما تعرفيش العروسة ، ولا
أصحاب الفرحة .

- الحالة :- لا أعرف العروسة ولا العريس أنا أعرف
صحتي .. وعرفتها من كام سنة من النت وبيننا
صداقة قوية .. كل ما انزل القاهرة أبلغها فتيجي
تقابلني . وصحتي دي أخت العريس .

- المحلل :- هل فكرتي لماذا لم تعرض عليكي صديقتك
الزواج من أخيها .

- الحالة :- هو كان خاطب قبل كده من سنة وكتب كتابه
لكن العروسة اتوفت . ودي عروسة جديدة .. أنا فكرت
قبل ما يخطب أول مرة لكن بعد كده نسيتهم ونسيت
الموضوع ولم أفكر فيهم نهائيا .. بس للأمانة أنا
اتعرفت على شاب من النت من فترة واتعلقت به جدًا
بس من ٢٨ يوليو لغى صداقتي ع الفيس ومن يومها
وأنا حزينه أوي أوي .. لغى الصداقة دون سبب واضح
مع العلم إن في العيد هو اللي هناني بالعيد .. هو اللي
بادر ومش أنا بس ده اللي حصل وده اللي مزعلني
أوي .

- المحلل :- وضحي لي أكثر الجزء ده : وحت اشتريت
برواز به سورة الإخلاص . لكنه صغير كانوا بروازين
وكل برواز في ورقة غلاف به .

- الحالة :- البنات لم أراها بالمنام بس هي كانت شارية
بروازين ، والاثنين عليهم سورة الإخلاص وفي
ورقتهم ، بس البرواز مفتوح من فوق وكانوا صغيرين
ومكتوب بالبروازين سورة الإخلاص .

- المحلل :- طيب أنت مخلصه في علاقتك بربك ؟

- الحالة :- الحمد لله وربنا يقدرني .. ختمت القران ٣ مرات في رمضان ، وصمت رمضان و٦ أيام من شوال ودي أول سنة أصوم ٦ كاملين .. السنة اللي فاتت صمت ٥ أيام من شوال بس .

- المحلل :- يعني نقدر نقول إن بقالك سنتين بتجتهدني إنك تقربي لربك .

- الحالة :- نعم ممكن ، الفترة الأخيرة أنا بقرا قرآن كتير الحمد لله .. حتى ليس قاصر على شهر رمضان .. ومع ذلك اللي حصل حصل ومفيش نصيب وحاسة إنني في ابتلاء .

- المحلل :- هل حاسيتي إن صديقتك جرحتك وهي بتقولك تحضري فرح أخوها على عروسة تانية غيرك .
- الحالة :- أبدأ والله .. أصلا صحبتي صعباته علي لأنها لم تتزوج أيضًا .. وهي أصلاً أكبر مني كمان .. والموضوع مش بفكر فيه نهائي .

- المحلل :- هل حدث إنك عرفتي أو سمعتي إن واحدة اتجوزت من واحد هو أحسن منها بكثير وكنتي تتمني إنه يكون جوزك أنت .

- الحالة : اللي جرحني وأثر في كثير إن الشاب اللي اتعرفت عليه حذف صداقتي فجأة دون سابق إنذار أو سبب .

- المحلل :- ممكن يكون خطب واحدة تانية أو اتجوز .
- الحالة :- مش فاكرة الحكاية دي بس في الغالب لا لا .. أنا يمكن اللي مآثر في إنني كل ما أحب واحد يروح مني .. الله أعلم بس كان مكلمني قبلها بأسبوع لم يكن في شيء .. وأسبوع لا يلحق يخطب أو يتزوج هذا الشاب .

- المحلل :- ممكن يكون حب واحدة برضه على الفيسبوك وقطع علاقته بيكي .

- الحالة :- بس حدث لي موقف قبلها بمدة .. كان لي زميل لي كان بيتمناني من فترة لكن لم يصرح لي .. وبعد ما اتزوج صرح لي إنه كان بيفكر بي بس بعد فوات الأوان . الله أعلم .. طيب تفسير الحلم إنه ممكن يرجع .. ولا خلاص .

- المحلل :- أنتي اللي جواكي عابزاه يرجع لك تاني .
- الحالة :- يعني مش راجع خلاص .. طيب تفسير الحلم إيه ؟؟ أنا حلمته بعد ما تركني وراح .

- المحلل :- قدرتي توصلني لتفسير الحلم من حوارنا مع بعض .

- الحالة :- التفسير إنني كنت بتمنى حاجة بس مش مكتوبة لي وملك واحدة تانية حضرتك تقصد كده .

- المحلل :- نعم .
- الحالة :- ألف شكر لحضرتك .. يعني بلاش أعيش في الأوهام وانزل الواقع . طيب ربنا ممكن هيعوضني عن اللي راح ولا هفضل حزينه كثير .

- التفسير :

- حلمت إنني ذهبت لمحل براويز .. (ومحل البراويز هنا رمز للفيسبوك) ، وقد أصبح وسيلة التعارف بين الشباب خاصة ، وكذا الحب والزواج .. وهو محل بديل لمحل الإقامة ، والبرواز على الفيسبوك متوفر فيه الصورة الشخصية لصاحب المحل (وهي صفحة الشخص على الفيسبوك) .

- وشفت واحدة مجهولة (العروسة اللي هتتجوز أخو صديقتك) اشترت براويز (العريس) ، والزواج صفقة فيها بيع وشراء ، والعريس يقول أنا جاي شاربي .. وأهل العروسة يقولون احنا بنشترني راجل .

- فقلت أشوف هي اشترت أيه عشان ممكن اشترى زيها (عريس) .

- وجات اشترت برواز به سورة الإخلاص (أنتي تري أن البنات المخلصة في علاقتها بربنا ، ربنا بيرزقها بابن الحلال) .. لكنه صغير كانوا بروازين وكل برواز في ورقة غلاف به .. (وبجملها عرسان كثير وهي اللي بتختار البرواز اللي يعجبها صغير السن .. والبرواز أيضًا رمز للسنة - وأنت اجتهدتي في العبادة والتقرب إلى الله وأخلصني له منذ عامين مضت) .

- شافنتي وضربتي على ظهري (أنت تعاقبين ذاتك لاعتقادك بأن سلوكك على الفيسبوك حرام وإنك كمان باصبة للعروسة وحابة تاخدي العريس منها ، والعقاب أيضًا جاء واقعيًا بالضرب على الظهر - بالفقا - من الشاب اللي أنتي اتعرفتي عليه وألغى صداقته بك) .

- وكونك اتحرجتي من العروسة قوي (تدل على إنك اتكسفت من نفسك ، لأنك تنظرين لما في يد غيرك ، وجاء ذلك بعد الإحباط الذي عشتيه بعد إلغاء حبيبك لصداقته معك) ثم عملت نفسك بتشوفي باقي البراويز (الشباب) في المحل (على الفيسبوك) .. لكنك شفتيهم ولا كأنك شفت حاجة .. (لأنك ما زلت متعلقة بحبيبك الذي ألغى صداقته معك على الفيسبوك .. وذلك على أمل أن الحبيب يرجع تاني لك) ..

- هكذا علاقات الحب على الفيسبوك .. دخولها سهل ، والخروج منها يكون ذهابًا بلا عودة .

خالص تحياتي

أ.د. عادل كمال خضر

E. mail : adelkhdr@fart.bu.edu.eg

This document was created with Win2PDF available at <http://www.win2pdf.com>.
The unregistered version of Win2PDF is for evaluation or non-commercial use only.
This page will not be added after purchasing Win2PDF.